



REPUBLIKA E SHQIPËRISË
AUTORITETI I KONKURENCËS
KOMISIONI I KONKURENCËS

VENDIM

Nr. 831, Datë 23.09.2021

“MBI AUTORIZIMIN E PËRQENDRIMIT TË REALIZUAR NËPËRMJET KRIJIMIT TË NJË NDËRMARRJE TË PËRBASHKËT (JOINT VENTURE), NGA SHOQËRITË ENEL X S.R.L. DHE VOLKSWAGEN FINANCE LUKSEMBURG SA”

Komisioni i Konkurrencës me pjesëmarrjen e:

Znj. Juliana LATIFI	Kryetar
Znj. Leida MATJA	Zv/Kryetar
Z. Eduard YPI	Anëtar
Znj. Adriana BERBERI	Anëtar
Z. Denar BIBA	Anëtar

Në mbledhjen e tij të datës 23.09.2021, shqyrtoi çështjen me:

Objekti: Autorizimi i përqendrimit të realizuar nëpërmjet krijimit të një ndërmarrje të përbashkët (JV), nga shoqëritë Enel X S.r.l. dhe Volkswagen Finance Luksemburg SA.

Baza Ligjore: Nenet 2, 10-12, neni 24, germa d, dhe nenet 53-64 të ligjit nr. 9121, datë 28.07.2003 “Për mbrojtjen e konkurrencës”, i ndryshuar; Rregullorja “Për zbatimin e procedurave të përqendrimit të ndërmarrjeve”; Udhëzimi “Për formën e njoftimit të përqendrimit” dhe Formulari i njoftimit të përqendrimit.

Komisioni i Konkurrencës, pas shqyrtimit të relacionit të Sekretarit të Përgjithshëm si dhe raportit të Drejtorisë së Analizës dhe Metodologjisë së Tregjeve mbi njoftimin e përqendrimit të realizuar nëpërmjet krijimit të një ndërmarrje të përbashkët, nga shoqëritë Enel X S.r.l. dhe Volkswagen Finance Luksemburg SA.

VËREN SE :

Transaksioni dhe procedura

Pranë Autoritetit të Konkurrencës është depozituar njoftimi mbi krijimin e një ndërmarrje të përbashkët nga shoqëritë Enel X S.r.l. dhe Volkswagen Finance Luksemburg SA.

Palët kanë nënshkruar më datë 24 qershor 2021 Marrëveshjen e Sipërmarrjes së Përbashkët ku:

Pala 1: Enel X S.r.l. është një shoqëri me përgjegjësi të kufizuar, që ekziston sipas legjislacionit të Republikës së Italisë. Enel X S.r.l është linja globale e Enel S.p.A., që fokusohet në produktet dhe shërbimet e lidhura me energjinë, duke përfshirë sistemet e shpërndarjes dhe bateritë, ndriçimin e zgjuar, lëvizshmërinë elektrike, shërbime të karikimit të shpejtë dhe software për sistemet e vetë-gjenerimit.

Enel S.p.A. është një shoqëri aksionare e listuar në bursë, e cila është shoqëria mbajtëse (holding company) e Enel Group. Grupi Enel nuk është i pranishëm në Shqipëri dhe nuk ka realizuar të ardhura në tregun shqiptar gjatë tre viteve të fundit.

Pala 2: Volkswagen Finance Luksemburg SA është një shoqëri aksionare, e organizuar sipas ligjeve të Luksemburgut dhe është pjesë e menaxhimit dhe industrisë së ndërmarrjeve. Volkswagen Finance Luksemburg SA është në pronësi të plotë të Grupit Volkswagen.

Pala 3: Volkswagen Aktiengesellschaft është një shoqëri aksionare gjermane, e themeluar sipas legjislacionit gjerman.

Grupi Volkswagen operon në Shqipëri përmes 2 filialeve Porsche Leasing SHPK dhe Porsche Albania SHPK.

Ndërmarrje e përbashkët (JV) do të krijohet me qëllimin për të investuar, zotëruar, shfrytëzuar dhe operuar një infrastrukturë karikimi të shpejtë për makinat elektrike në Itali.

JV nuk do të ushtrojë aktivitetet në Shqipëri.

Më datë 24 qershor 2021, shoqëritë Enel X S.r.l., Volkswagen Finance Luxemburg SA dhe Volkswagen Aktiengesellschaft, kanë nënshkruar “Marrëveshjen e Sipërmarrjes së Përbashkët”, përmes së cilës do të themelojnë një ndërmarrje të përbashkët, me kontribute të barabarta në kapital ku shoqëritë Volkswagen Finance Luxemburg SA dhe Enel X S.r.l. do të zotërojnë 50% të kapitalit aksionar.

Sipas dokumentacionit të depozituar, transaksioni plotëson kriteret e përcaktuara në nenin 10 dhe 12, të ligjit nr. 9121, datë 28.07.2003 “Për mbrojtjen e konkurrencës”, i ndryshuar dhe si i tillë kërkohet autorizimi nga Komisioni i Konkurrencës

Vlerësimi i konkurrencës

Referuar nenit 3, pika 7, të ligjit nr. 9121, datë 28.07.2003 “Për mbrojtjen e konkurrencës”, i ndryshuar, si edhe Udhëzimit nr.76, datë 07.04.2008 “Për përcaktimin e tregut përkatës”, treg përkatës i produktit do të konsiderohet tregu për instalimin, funksionimin dhe mirëmbajtjen e stacioneve të karikimit me fuqi të lartë elektrike për automjetet elektrike, të cilat do të jenë të aksesueshme publikisht, por duke qenë se transaksioni nuk do të ketë asnjë ndikim në tregun shqiptar si edhe duke iu referuar praktikave të Komisionit Evropian në çështje të ngjashme, tregu përkatës i produktit do të lihet i hapur. Treg përkatës gjeografik do të konsiderohet territori i Republikës së Shqipërisë.

Transaksioni i propozuar është krijimi i një ndërmarrje të përbashkët me funksione të plota JV nga shoqëria Enel X S.r.l. dhe shoqëria Volkswagen Finance Luxemburg SA.

Volkswagen Finance Luxemburg SA është një shoqëri Holding e Grupit Volkswagen, grup i cili operon në Shqipëri përmes shoqërive të zotëruar indirekt prej tij: Porsche Albania SHPK dhe Porsche Leasing SHPK. Enel X S.r.L është pjese e Grupit Enel, grup i cili nuk operon dhe nuk ka realizuar të ardhura në Shqipëri në 3 vitet e fundit.

Ndërmarrja e përbashkët JV nuk operon në Shqipëri.

Përqendrimi nuk do të krijojë mbivendosje ose marrëdhënie të rrjedhës së sipërme apo të poshtme midis aktiviteteve të palëve në nivel kombëtar dhe për këto arsye, transaksioni i synuar nuk do të sjellë asnjë ndryshim dhe nuk do të ketë asnjë ndikim në tregun shqiptar.

PËR KËTO ARSYE:

Komisioni i Konkurrencës, në bazë të nenit 24, shkronja d dhe nenit 56 pika 1 të ligjit nr. 9121, datë 28.07.2003 “Për mbrojtjen e konkurrencës”, i ndryshuar,

VENDOSI:

1. Të autorizojë përqendrimin e realizuar nëpërmjet krijimit të një ndërmarrje të përbashkët, (Joint Venture), nga shoqëritë Enel X S.r.l. dhe Volkswagen Finance Luksemburg SA.
2. Ngarkohet Sekretari i Përgjithshëm për njoftimin e palëve dhe dërgimin e vendimit pasi të bëhen pagesat që parashikon rregullorja “Për caktimin e shpenzimeve për ndjekjen e procedurave pranë Autoritetit të Konkurrencës”.

Ky vendim hyn në fuqi menjëherë.

KOMISIONI I KONKURRENCËS